

柳河東文集

五

河東先生文集卷五

書

寄許京兆孟容書

宗元再拜五丈座前。伏蒙賜書誨諭。微悉重厚。欣踊恍惚。疑若

捧書叩頭。悖不

自定。伏念得罪來五年。未嘗有故舊大臣。肯以書見及者。何則。罪謗交積。羣疑當道。誠可怪而畏也。是以兀兀忘行。尤負重憂。殘骸餘魂。百病所集。痞結伏積。不食自飽。或時寒熱。水火互至。內消肌骨。非獨瘡癰為也。忽奉教命。乃知幸為大君子所宥。欲使膏肓。況沒復起。為人夫。何素望。敢以及此。宗元早歲與負罪者親善。始奇其能。謂可以共立仁義。裨教化。過不自料。慙慙勉勵。惟以中正信義為志。以興堯舜孔子之道。利安元元為務。不知愚陋。不可力彊。其素意如此也。末路厄塞。覩兀事既壅隔。狠忤貴近。狂疏繆戾。蹈不測之辜。羣言沸騰。鬼神交怒。加以素卑賤。暴起領事。人所不信。私來小人之危以快其角逐未遂之射利求進者。填門排戶。百不一得。一旦快意更造怨讐。以此大罪之外。詆訶萬端。旁午構扇。便為敵讎。協心同攻。外連彊暴失職者。以致其事。此皆丈人所聞見。不敢為他人道說。懷不能已。復載簡牘。此人雖萬被誅。戮不足塞責。而豈有賞哉。今其黨與幸獲寬貸。各得善地。無公事。坐食俸祿。明德至。

渥也。尚何敢更俟除棄廢痼。以希望外之澤哉。年少氣銳。不識幾微。不知當。不但欲一。心直。遂果陷刑法。皆自所求。取得之又何怪也。宗元於衆黨人中。罪狀最甚。神理降罰。又不能即死。猶對人言語。求食自活。迷不知恥。日復一日。然亦有大故。自以得姓。來二千五百年代。為家嗣。今抱非常之罪。居夷獠之鄉。卑濕昏霧。恐一日填委溝壑。曠墜先緒。以是怛然痛恨。心骨沸熱。煢煢孤立。未有子息。荒陬中少士人女子。無與為婚。世亦不肯與罪人親昵。以是嗣續之重。不絕如縷。每常春秋時饗。子立捧奠。顧眄無後繼者。凜凜然欷歔惄惄。恐此事便已。推心傷骨。若受鋒刃。此誠大人所共憫惜也。先墓在城南。無異子弟為主。獨託村隣。自謹逐來。消息存亡。不一至鄉間。主守者固以益怠。晝夜哀憤。懼便毀傷松柏。芻牧不禁。以成大戾。近世禮重拜掃。今已闕者四年矣。每遇寒食。則北向長號。以首頓地。想田野道路。士女遍滿。皂隸庸丐。皆得上父母丘墓。馬醫夏畦之鬼。無不受子孫追養者。然此已息。望又何以云哉。城西有數頃田。樹果數百株。多先人手自封植。今已荒穢。恐便斬伐。無復愛惜。家有賜書三千卷。尚在善和里舊宅。宅今已三易主。書存亡不可知。皆付受所重。常繫心腑。然無可為者。立身一敗。萬事瓦裂。身殘家破。為世大僇。復何敢更望大君子撫慰收卹。尚置人數中耶。是以當食不知辛酸。節適洗沐盥漱。動逾歲時。一搔皮膚。塵垢滿爪。

誠憂恐悲傷無所告愬以至此也。自古賢人才士秉志遵分被謗議不能自明者僅以百數故有無兄盜嫂娶孤女云撻婦翁者然賴當世豪傑分明辨別卒光史籍管仲遇盜升為功臣匡章被不孝之名孟子禮之今已無古人之實為而有詬欲望世人之明已不可得也直不疑買金以償同舍劉寃下車歸牛鄉人此誠知疑似之不可辯非口舌所能勝也鄭詹束縛於晉終以無死鍾儀南音卒獲返國叔向囚虜自期必免范座騎危以生易死崩通據鼎耳為齊上客張蒼韓信伏斧鑽終取將相鄒陽獄中以書自活賈生斥逐復召宣室倪寬擯死後至御史大夫董仲舒劉向下獄當誅為漢儒宗此皆瓊偉博辯奇壯之士能自解脫今以恆怯淟涊下才末技又嬰恐懼痼病雖欲慷慨攘臂自同昔人愈疎闊矣賢者不得志於今必取貴於後古之著書者皆是也宗元近欲務此然力薄才劣無異能解雖欲秉筆覲音力繆神志荒耗前後遺忘終不能成章往時讀書自以不至祇滯今皆頑然無復省錄每讀古人一傳數紙以後則再三伸卷復觀姓氏旋又廢失假今萬一除刑部因籍復為士列亦不堪當世用矣伏惟興哀於無用之地垂德於不報之所但以通家宗祀為念有可動心者操之勿失不敢望歸掃塋域退託先人之廬以盡餘齒姑遂少北益輕瘴癘就婚娶求胤嗣有可付託即冥然長辭如得甘寢無復恨矣書辭繁委無以自道

然即文以求其志。君子固得其肺肝焉。無任懇戀之至。不宣。宗元再拜。

與楊京兆憑書

月日。宗元再拜。獻書丈人役人胡要返命。奉教誨。壯厲感發。鋪陳廣大。上言推延賢雋之道。難於今之世。次及文章。末以愚蒙剝喪頓悴。無以守宗族。復田畝為念。憂憫備極。不惟其親密故舊是與。復有公言顯賞。許其素尚。而激其忠誠者。用是踊躍敬懼。類嚮時所被簡牘。萬萬有加焉。故敢悉其愚。以獻左右。大凡薦舉之道。古人之所謂難者。其難非苟一而已矣。知之難言之。難聽信之。難。夫人有有之而恥言之者。有有之而樂言之者。有無之而工言之者。有無之而不言似有之者。有之而恥言之者。上有也。雖舜猶難知之。孔子亦曰。失之子羽。下斯而言。知而不失者。妄矣。有之而言之者。次也。德如漢光武。馮衍不用才。如王景略。以尹緯為令史。是皆終日號鳴大叱。而卒莫之省。無之而工言者。賊也。趙括得以代廉頤。馬謖得以惑孔明。今之若此類者。不乏於世。將相大臣。聞其言而必能辨之者。亦妄矣。無之而不言者。土木類也。周仁以重臣為二千石。許靖以人譽而致位三公。近世尤好此類。以為長者。最得薦寵。夫言朴愚無害者。其於田野鄉閭為匹夫。雖稱為長者可也。自抱關繫栎以往。則必敬其事。愈上則及物者愈大。何事無用之朴哉。今之言曰。某子長者。可以為大官。類非

古之所謂長者也。則必土木而已矣。夫捧土揭木而致之巖廊之上。蒙以綏冕翼以徒隸。趨走其左右。豈有補於萬民之勞苦哉。聖人之道。不益於世用。凡以此也。故曰知之難。孔子曰。仁者其言也訥。孟子病未同而言。然則彼未吾信。而吾告之以士。必有三間。是將曰。彼誠知士歟。知文歟。疑之而未重。一間也。又曰。彼無乃私好歟。交以利歟。二間也。又曰。彼不足我而甚我哉。茲咷吾事。三間也。畏是而不言。故曰言之難。而有是患。故曰聽信之難。唯明者為能得其所以薦。得其所以聽。一不至。則不可冀矣。然而君子不以言聽之難而不務取士。士理之本也。苟有司之不吾信。吾知之不捨。其必有信吾者矣。苟知之雖無有司。而士可以顯。則吾一旦操用人之柄。其必有施矣。故公卿之大任。莫若索士。士不預備。而熟講之。卒然君有問焉。宰相有咨焉。有司有求焉。其無所以應之。則大臣之道或闕。故不可憚煩今之世。言士者先文章。文章士之末也。然立言存乎其中。即末而操其本。可十七八。未易忽也。自古文士之多莫如今。今之後生為文。希屈馬者可得數人。希王褒劉向之徒者。又可得十人。至陸機潘岳之比。累累相望。若皆為之不已。則文章之大盛。古未有也。後代乃可知之。今之俗耳庸目。無所取信。傑然特異者。乃見此耳。丈人以文律通流當世。叔仲鼎列天下。號為文章家。今又生敬之敬之。希屈馬者之一也。天下方理平。今之文士。咸能先

理。理不一斷於古書。老生直趣堯舜大道。孔氏之志明而出之。又古之所難有也。然則文章未必為士之末。獨采取何如耳。宗元自小學為文章中間。幸聯得甲乙科第。至尚書郎。專百官章奏。然未能究知為文之道。自貶官來。無事讀百家書。上下馳騁。乃少得知文章利病。去年吳武陵來。美其齒少。才氣壯健。可以興西漢之文章。日與之言。因為之出數十篇書。庶幾鏗鏘陶冶。時時得見古人情狀。然彼古人亦人耳。夫何遠哉。凡人可以言古。不可以言今。桓譚亦云。親見楊子雲容貌不能動人。安肯傳其書。誠使博如莊周。哀如屈原。奧如孟軻。壯如李斯。峻如馬遷。富如相如。明如賈誼。專如楊雄。猶為今之人。則世之高者。至少矣。由此觀之。古之人。未必不薄於當世。而榮於後世也。若吳子之文。非丈人無以知之。獨恐世人之才高者。不肯久學。無以盡訓詁風雅之道。以為一世甚盛。若宗元者。才力缺敗。不能遠騁。高厲與諸生摩九霄。撫四海。夸耀於後之人矣。何也。凡為文。以神志為主。自遭責逐。繼以大故。荒亂耗竭。又常積憂憊。恐神志少矣。所讀書隨又遺忘。二年來。痞氣尤甚。加以衆疾。動作不常。眊眊然。駭擾內生靈霧。填擁慘沮。雖有意窮文章。而病奪其志矣。每聞人大言。則蹶氣震怖。撫心按膽。不能自止。又永州多火災。五年之間。四為大火所迫。徒跣走出壞牆穴牖。僅免燔灼。書籍散亂。毀裂不知所往。一遇火恐。累日茫然。不能出言。又安能

盡意於筆硯。矻矻自苦。以傷危敗之魂哉。中心之悃愞鬱結。具載所獻。許京兆大人書。不能重煩於陳列。凡人之黜棄。皆望望思得效用。而宗元獨以無有是念。自以罪大不可解。才質無所入。苟焉以敘憂憤為幸。敢有他志。伏以先君稟孝德。秉直道。高於天下。仕再登朝。至六品官。宗元無似。亦嘗再登朝。至六品矣。何以堪此。且柳氏號為大族。五六從以來。無為朝士者。豈愚蒙獨出數百人右哉。以是自忖。官已過矣。寵已厚矣。夫知足與知止異。宗元知足矣。若便止不受祿位。亦所未能。今復得好官。猶不辭讓。何也。以人望人。尚足自進。如其不至。則故無憾。進取之志息矣。身世子然。無可以為家。雖甚崇寵之。熟與為榮。獨恨不幸。獲託姻好。而早凋落。寡居十餘年。嘗有一男子。然無一日之命。至今無以託嗣續。恨痛常在心目。孟子稱。不孝有三。無後為大。今之汲汲於世者。唯懼此而已矣。天若不棄先君之德。使有世嗣。或者猶望延壽。命以及大宥。得歸鄉閭。立家室。則子道畢矣。過是而猶競於寵利者。天厭之。天厭之。丈人旦夕歸朝廷。復為大僚。伏惟以此為念。流涕頓頰。布之座右。不勝感激之至。宗元再拜。

與裴埙書

應叔十四兄足下。比得書。示勤勤。不以僕罪過為大故。有動止相憫者。僕望已矣。世。

所共棄。唯應叔輩一二公獨未耳。僕之罪在年少好事。進而不能止。傳輩恨怒。以先得官。又不幸早嘗與游者居權衡之地。十薦賢。幸乃一售。不得者。誇張排根。僕可出而辯之哉。性又陋野。不能摧折。以故名益惡。勢益險。有喙有耳者。相郵傳作醜語。不知其卒云何。中心之愆尤若此而已。旣受禁錮。而不能即死者。以為久當自明。今亦久矣。而嗔罵者尚不肯已。堅然相白者無數人。聖上日興太平之理。不貢不王者。悉以誅討。而制度大立。長使僕輩為匪人耶。其終無以見明。而不得擊壤鼓腹樂堯舜之道耶。且天下熙熙。而獨呻吟者四五人。何其憂裕者博。而局束者寡。其為不一徵也。何哉。大和菴物燕谷。不被其煦。一鄒子。尚能耻之。今若應叔輩知我。豈下鄒子哉。然而不恥者。何也。河北之師。當已平矣。屬聞吉語矣。然若僕者。承大慶之後。必有殊澤。流言飛文之罪。或者其可以已乎。幸致數百里之北。使天下之人。不謂僕為明時異物。死不恨矣。金州考績已久。獨夢幾然不遷者。何耶。十二兄宜當更轉右職。十四兄嘗得數書。無恙。兄顧惟僕之窮途。得無意乎。北當大寒。人愈和平。惟楚南極海。玄冥所不統。炎昏多疾。氣力益劣。昧昧然人事。百不記。一捨憂慄。則怠而睡耳。偶書如此。不宣。宗元再拜。

註釋裴壘封叔河北之師討王承宗承宗之先武後金州即封

本奚契丹種故曰奚虜

與蕭翰林俛書

思謙兄足下。昨祁縣王師範過永州為僕言。得張左司書。道思謙塞然有當官之心。乃誠助太平者也。僕聞之喜甚。然微王生之說。僕豈不素知耶。所喜者耳。與心叶。果於不謬焉爾。僕不幸嚮者進當艱_{艱切}。結_帆五_忽不安之勢。平居閉門口舌無數。况又有久與游者。乃岌岌而操其間。其求進而退者。皆聚為仇怨。造作粉飾。蔓延益肆。非的然昭晰。自斷於內。則孰能了僕於冥冥之間哉。然僕當時年三十三。甚少。自御史裏行。得禮部員外郎。超取顯美。欲免世之求進者。怪怒妬嫉。其可得乎。凡人皆欲自達。僕先得顯處。才不能踰同列。名不能壓當世。世之怒僕。宜也。與罪人交十年。官又以是進。辱在附會。聖朝弘大賤黜甚薄。不能塞衆人之怒。謗語轉移。囁囁噭噭。漸成怪民。飾智求仕者。更言僕以悅讎人之心。日為新奇。務相喜可。自以速援引之路而僕輩坐益困辱。萬罪橫生。不知其端。伏自思念。過大恩甚。乃以致此悲夫。人生少得六七十者。今已三十七矣。長來覺日月益促。歲歲更甚。大都不過數十寒暑。則無此身矣。是非榮辱又何足道云云。不已。祗益為罪。兄知之勿為他人言也。居蠻夷中久。慣習炎毒。昏眊重膚。意以為常。忽遇北風。晨起薄寒。中體則肌革慘懔。毛髮蕭條。瞿然注視。怵惕以為異候。意緒殆非中國人。楚越間聲音特異。鳩舌嘵謨。今聽之。怡然。

不怪已與為類矣。家生小童皆自然曉曉。晝夜滿耳聞。北人言則啼呼走匿。雖病夫亦怛然駭之。出門見適州閭市井者。其十有八九杖而後興。自料居此尚復幾何。豈可更不知止。言說長短重為一世。非笑哉。讀周易困卦。至有言不信。尚口乃窮也。往復益喜。曰嗟乎。余雖家置一喙以自稱。道詒益甚耳。用是更樂瘖默。思與木石為徒。不復致意。今天子興教化。定邪正。海內皆欣欣怡愉。而僕與四五子者。獨淪陷如此。豈非命歟。命乃天也。非云云者所制。余又何恨。獨喜思謙之徒。遭時言道。道之行。物得其利。僕誠有罪。然豈不在一物之數耶。身被之。目覩之。足矣。何必攘袂用力而矜自我出耶。果矜之。又非道也。事誠如此。然居理平之世。終身為頑人之類。猶有少恥。未能盡忘。儻因賊平慶賞之際。得以見白。使受天澤餘潤。雖朽折敗腐。不能生植。猶足蒸出芝菌以為瑞物。一釋廢錮。移數縣之地。則世必曰。罪稍解矣。然後收召魂魄。買土一鄼。為耕甿。朝夕謌謠。使成文章。庶木鐸者。采取獻之法宮。增聖唐大雅之什。雖不得位。亦不虛為太平之人矣。此在望外。然終欲為兄。一言焉。宗元再拜。

與李翰林建書

杓直足下。州傳遞至。得足下書。又於夢得處。得足下前次一書。意皆勤厚。莊周言逃蓬蘽者。聞人足音。則跫然喜。僕在蠻夷中。比得足下二書。及致藥餌。喜復何言。僕自

去年八月來。瘡疾稍已。往時間一二日作。今一月乃二三作用。南人檳榔餘甘。破決壅隔。大過陰邪。雖敗已傷。正氣行則膝顫。坐則髀聾。去痺所欲者。補氣豐血。強筋骨。輔心力。有與此宜者。更致數物。得良方偕至。益善。永州於楚為最南。狀與越相類。僕悶即出游。游復多恐。涉野則有蝮虺。大蜂仰空視地。寸步勞倦。近水即畏射工沙虱。含怒竊發。中人形影動成瘡痏。時到幽樹好石。暫得一笑。已復不樂。何者。譬如囚拘圜土。一遇和景。負牆搔摩。伸展支體。當此之時。亦以為適。然顧地窺天。不過尋丈。終不得出。豈復能久為舒暢哉。明守百姓。皆獲歡樂。僕士人頗識古今理道。獨愴愴如此。誠不足為理。世下執事。至比愚夫愚婦。又不可得。竊自悼也。僕曩時所犯。足下適在禁中。備觀本末。不復一一言之。今僕瘡殘頑鄙。不死幸甚。苟為堯人。不必立事程功。唯欲為量移官。差輕罪累。即便耕田藝麻。取老農女為妻。生男育孫。以供力役。時時作文。以詠太平。摧傷之餘氣力。可想而知。令病盡已。身復壯。悠悠人世。不過三十年客耳。前過三十年。與瞬息無異。復所得者。其不足。祀。既亦已審矣。杓直以為誠然乎。僕近求得經史諸子數百卷。嘗候戰。憐稍定。時即伏讀。頗見聖人用心。賢士君子立志之分。著書亦數十篇。心病言少次第。不足遠寄。但用自釋。貧者士之常。今僕雖羸餒。亦甘如飴矣。足下言已白常州煦僕僕。豈敢衆人待常州耶。若衆人即不復煦僕。

矣然常州未嘗有書遺僕僕安敢先焉裴應叔蕭思謙僕各有書足下求取觀之相戒勿示人敦詩在近地簡人事今不能致書足下默以此書見之勉盡志慮輔成一王之法以宥罪戾不悉某白

與顧十郎書

四月五日門生守永州司馬員外置同正員柳宗元謹致書十郎。凡號門生而不知恩之所自者非人也。纓冠束袨而趨以進者咸曰我知恩知恩則惡乎辨然而辨之亦非難也。大抵當隆赫柄用而蜂附蟻合煦煦便僻匍匐以非乎人而售乎己若是者一旦勢異則電滅風逝不為門下用矣。其或少知恥懼恐世人之非已也則矯於中以貌於外其實亦莫能至焉。然則當其時而確固自守蓄力秉志不為嚮者之態則於勢之異也固有望焉。大凡以文出門下由庶士而登司徒者七十有九人執事試追狀其態則果能効用者出矣。然而中間招衆口飛語譁然譎張者豈他人耶夫固出自門下賴中山劉禹錫等遑遑惕憂無日不在信臣之門以務白大德順宗時顯贈榮謚揚于天官敷于天下以為親戚門生光寵不意璵璵者復以病執事此誠私心痛之埋鬱洶湧不知所發常以自憾在朝不能有奇節宏議以立於當世卒就廢逐居窮厄又不能著書斷往古明聖法以致無窮之名進退無以異於衆人

不克顯明。門下得士之大。今抱德厚蓄憤悱。思有以効于前者。則既乖謬于時。離散
擅抑。而無所施用。長為孤囚。不能自明。恐執事終以不知其始。偃蹇退匿者。將以為
為也。猶流于嚮時求進者之言。而下情無以通。盛德無以酬。用為大恨。固常不欲言。
之。今懼老死瘴土。而他人無以辨其志。故為執事一出之。古之人。恥躬之不逮。儻或
萬萬有一可冀。復處人間。則斯言幾乎踐矣。因言感激。浪然出涕。書不能既。宗元謹
再拜。

註釋顧十郎子厚

老師顧少連少子也。其子也。少連十郎即師門。豈十郎即師門。豈

與韓愈論史官書

正月二十一日某頓首十八丈退之侍者。前獲書言史事。云具與劉秀才書。及今乃
見書藁。私心甚不喜。與退之往年言史事甚大謬。若書中言退之不宜。一日在館下。
安有探宰相意。以為苟以史榮一韓退之耶。若果爾。退之豈宜虛受宰相榮已。而冒
居館下。近密地食奉養。役使掌固利紙筆為私書。取以供子弟費。古之志於道者不
若是。且退之以為紀錄者有刑禍。避不肯就。尤非也。史以名為褒貶。猶且恐懼不敢
為。設使退之為御史中丞大夫。其褒貶成敗。人愈益顯。其宜。恐懼尤大也。則又將揚
揚入臺府。美食安坐。行呼唱於朝廷而已耶。在御史猶爾。設使退之為宰相。生殺出

入升黜天下士其敵益衆則又將揚揚入政事堂美食安坐行呼唱於內庭外儻而已耶何以異不為史而榮其號利其祿者也又言不有人禍則有天刑若以罪夫前古之為史者然亦甚惑凡居其位思直其道道苟直雖死不可回也如回之莫若亟去其位孔子之困于魯衛陳宋蔡齊楚者其時暗諸侯不能以也其不遇而死不以作春秋故也當其時雖不作春秋孔子猶不遇而死也若周公史佚雖紀言書事猶遇且顯也又不得以春秋為孔子累范曄悖亂雖不為史其族亦赤司馬遷觸天子喜怒班固不檢下崔浩沽其直以鬪暴虧皆非中道左丘明以疾盲出於不幸子夏不為史亦盲不可以是為戒其餘皆不出此是退之宜守中道不忘其直無以他事自恐退之之恐唯在不直不得中道刑禍非所恐也凡言二百年文武事多有誠如此者今退之曰我一人也何能明則同職者又所云若是後來繼今者又所云若是人人皆曰我一人則卒誰能紀傳之耶如退之但以所聞知孜孜不敢怠同職者後來繼今者亦各以所聞知孜孜不敢怠則庶幾不墜使卒有明也不然徒信人口語每每異辭日以滋久則所云磊磊軒天地者決必不沉沒且亂雜無可考非有志者所忍恣也果有志豈當待人督責迫蹙然後為官守耶又凡鬼神事眇茫荒惑無可準明者所不道退之之智而猶懼於此今學如退之辭如退之好言論如退之慷慨

自為正直行。行焉如退之猶所云若是。則唐之史述其卒無可託乎。明天子賢宰相得史才。如此而又不果。甚可痛哉。退之宜更思可為速為。果卒以為恐懼不敢。則一日可引去。又何以云行且謀也。今當為而不為。又誘館中他人及後生者。此大惑已。不勉已。而欲勉人難矣哉。

與史官韓愈致段秀實太尉逸事書

退之館下。前者書進退之力史事。奉答誠中吾病。若疑不得實。未即籍者。諸皆是也。退之平生。不以不信見遇。竊自冠好遊邊上。問故老卒更。得段太尉事最詳。今所趨走州刺史崔公時。賜言事。又具得太尉實跡。參校備具。太尉大節。古固無有。然人以為偶一奮。遂名無窮。今大不然。太尉自有難在軍中。其處心未嘗虧側。其蒞事無一不可紀。會在下。名未達。以故不聞。非直以一時取笏為謙也。史遷死。退之復以史道在職。宜不苟過。日時昔與退之期為史。志甚壯。今孤囚廢錮。連遭瘴癘。羸頓朝夕就死。無能為也。第不能竟其業。若太尉者。宜使勿墜。太史遷言荆軻徵夏。無且言大將軍徵蘇建。言留侯徵畫容貌。今孤囚賤辱。雖不及無且。建等然比畫工。傅容貌尚差。勝。春秋傳所謂傳信傳著。雖孔子亦猶是也。竊自以為信且著。其逸事有狀。

答劉禹錫天論書

宗元曰。發書得天論三篇。以僕所為天說為未究。欲畢其言。始得之大喜。謂有以開明吾志。慮及詳讀五六日。求其所以異吾語。卒不可得。其歸要曰。非天預乎人也。凡子之論。乃吾天說傳疏耳。無異道焉。諄諄佐吾言。而曰。有以異不識。何以為異也。子之所以為異者。豈不以贊天之能生植也。歟。天之能生植久矣。不待贊而顯。且子以天之生植為人耶。抑自生而植乎。若以為為人。則吾愈不識也。若果以為自生而植。則彼自生而植耳。何以異夫果蓏之自為果蓏。癰痔之自為癰痔。草木之自為草木耶。是非為蟲謀明矣。猶天之不謀乎人也。彼不我謀。而我何為務勝之耶。子所謂交勝者。若天恒為惡。人恒為善。人勝天。則善者行。是又過德乎。人過罪乎。天也。又曰。天之能者生植也。人之能者法制也。是判天與人為四而言之者也。余則曰。生植與災荒皆天也。法制與悖亂皆人也。二之而已。其事各行不相預。而凶豐理亂出焉。究之矣。凡子之辭。枝葉甚美。而根不直取以遂焉。又子之喻乎旅者。皆人也。而一曰天勝焉。一曰人勝焉。何哉。莽蒼之先者。力勝也。邑郛之先者。智勝也。虞芮力窮也。匡宋智窮也。是非存亡。皆未見其可以喻乎天者。若子之說。要以亂為天理。理為人理耶。謬矣。若操舟之言人與天者。愚民恒說耳。幽厲之云為上帝者。為所歸怨之辭耳。皆不足喻乎。道子其熟之。無羨言侈論以益其枝葉。姑務本之為得。不亦裕乎。獨所謂